

蜀

水

經

蜀水經卷之五

京山

李

江水又東經江安縣城北

江安縣故江陽地也東漢分置漢安縣屬犍爲郡晉
改屬江陽郡分置綿水縣宋爲東江陽郡隋開皇十
八年改漢安爲江安屬瀘州唐貞觀元年分置思緣
思逢施陽三縣八年省施陽又分置涇南縣十三年
俱廢儀鳳二年平蠻置柯陰縣屬晏州宋乾德五年

省綿水入江安領寧遠安夷西寧遠南武寧安遠六
砦元明屬瀘州○城南有照山亦名鏡子山一峯中
峙兩峯旁翼二溪交流峯巒蔥蒨菴廬梵室金碧交
輝旁有二潭爲龍所居禱旱輒應山有眠雲石龍淵
磻玕瑤巖磨鎌溪爲一邑勝遊之地鄧弼祭陽安廟
記曰吾邑城外汶江流其東清溪匯其左溪上陰巖
峭峙草木芩蔚下臨溪潭蒼黯寒碧有神宅焉號曰
五龍○熙寧七年熊本招降瀘夷獨柯陰酋不下本
合晏州十九姓之衆進討溪入柯陰乃乞降本請改

柯陰爲歸徠州以其酋箇恕知州元豐四年州廢箇
恕子乞弟與韓存寶擊平羅苟夷以功驕慢圍羅箇
牟族併率兵江安城下索賞存寶不能禦林廣代將
乃召熟夷楊光震同擊敗乞弟於納谿破樂共城進
土滿村及樂婆屯入發納江經老人山度飛墨巖歷
鴉飛不到山抵歸徠州而乞弟遁乃還築樂共城戍
守政和五年晏州酋卜漏反因上元張燈襲破梅嶺
砦攻樂共城召發陝西軍三萬人以趙通領之通捕
山揉束麻灌蠟熬之猱奔燒賊舍乃斬卜漏拓地二

千里

江水又東受清溪

卽綿水也明史曰縣北濱大江有綿水西南流入之
謂之綿水口

江水又東南經涇口受清溪

涇灘在縣南三十里溪水自山頂而下瀑布飛洒長
數十丈匯爲溪潭相傳五侯七貴之地唐置涇南縣
在涇水之南宋咸平中晏州多剛縣夷人爲亂寇瑛
王懷信會兵于涇灘大敗之夜渡晏江擊破其衆夷

人寧息

長年云水土濠泥雨嶺苦田壩鐵城砦桌子磯鑼鍋
礪香爐灘金雞尾綿水口江安縣其三十里草壩場
二龍口黃葛礪老坑墓頭沱風波礪涇口乾礪窩董
壩驛其六十里按桌子金雞老坑乾礪險灘也

江水又東北經納谿縣城北

納谿縣故江陽地也唐儀鳳二年開山洞置納州領
羅圍播羅施陽胡茂都掌寧羅當羅藍都八縣天寶
改都寧郡宋皇祐三年置納谿砦屬江安縣紹定五

年改砦爲縣屬瀘州○元大德中縣因水害移治縣
北十里至大初復還舊治今舊縣壩是大德所移舊
縣縣基尙存有掘得銅犧象樽一太和和莢盃一對
三存貯學宮

江水又東北受納江納江源出水寧縣徼外阿永蕃部
北受清溪又北受石獅溪又北受甘溪甘溪源出唐家
灣北會道場河北入納納江又北經永寧縣城東南穿
城而出北經江門峽受通溪又北受宋江宋江源出大
壩蠻洞中東北受姑溪又東受魚清溪又東入納納江

又北受羅幹溪又北受花背溪又北受通津水又北入江

納江亦名清水亦名雲溪亦名界首河姑溪亦名落巖河宸宇記曰納溪源出牂牁生獠界來入汶江名勝記曰納州納水所出流至納谿縣之西門與瀘江合明史曰洪武二十三年永寧宣撫言所轄地水道有一百九十灘其江門大灘有十二處皆石塞其流詔曹震疏之

敘永屬永寧縣故蠻也晉開置永寧縣屬雲南郡唐

元和元年改蘭州宋廢州置永寧路元改軍民安撫
司明玉珍置鎮邊都元帥府明洪武十三年改永寧
衛隸雲南尋改長官司隸四川永樂十一年改衛隸
貴州天啟三年置敘永廳同知屬四川敘永府駐西
城永寧衛屬貴州威寧府駐東城 國朝康熙二十
六年改衛爲縣雍正五年以縣屬敘州府八年改屬
敘永廳廳直隸永寧

江水又北經擬旗灘

漢諸葛武侯豎旗誓蠻處今謂之大錫梁蓋江中有

三大石橫亘爲阻此其第一石也次石俗稱觀音砬
三石俗稱虎背灣俱在城北稍東爲行舟險處

長年云董壩驛大渡口大角石金鞭灘虎渡場賴石
林清溪野豬巖老鷹巖石窰灘連牽林納谿縣共六
十里永寧河撥旗灘觀音背虎背灣石礮關共三十
里按大踞梁觀音背虎背灣險灘也以上各險灘非
銅鉛舡所經未經報部而夏漲最險行舟慎之

江水又東北經石棚鎮

明成化四年置巡檢司今廢

江水又東北經瀘州城東

瀘州故江陽縣也漢置屬犍爲郡景帝六年封趙相
蔣嘉爲江陽侯後置支江都尉建安十八年改置江
陽郡昭烈帝入蜀遣諸葛武侯張桓侯沂流定江陽
晉安帝僑置郡治武陽宋復還故治爲東江陽郡梁
改置瀘州隋仁壽中置總管府大業改瀘川郡治瀘
川縣唐武德元年復爲瀘州三年置總管府改都督
府分置順州領曲水順山靈巖來懷龍池五縣宋州
領荊龍荆支宋水瀘吾四縣天寶改瀘川郡乾元復

故屬劍南道宋爲瀘州瀘川郡領江安合江二縣南
井監樂共九支武都三城羈縻州納薛晏鞏奉悅能
清漸定宋順藍奏高兢思義長寧十八州元豐四年
改樂共爲江門砦鎮溪梅嶺大洲三堡大觀二年改
九支爲純州領九支安溪二縣及美利城三年改武
鄰爲蒞州置承流仁懷二縣宣和二年諸羈縻州縣
併廢景定間改江安州屬潼川路元復爲瀘州至元
二十年省瀘川縣二十二年改屬重慶府明洪武改
直隸下川南道今隸永寧道○勾公權縣廨記曰江

陽氣候偏陽夏秋多炎熱冬無苦寒每夏秋蒸溽如
傷挹火精孫義叟修城記曰瀘控西南諸夷遠逮蠻
蠻最爲邊隅重地元豐以來用武臣其後始更置儒
守宋李璣西山堂記曰以常璩華陽國記及辛怡顯
雲南錄考之諸葛渡瀘乃在越嶲之地非瀘之寶山
也邇得名爲瀘者蓋始因梁大同中嘗徙治馬湖江
口置瀘州馬湖卽瀘水下流因遠取瀘水以名州○
宋淳祐三年余玠遷州治於神臂巖亦謂鐵瀘城元
至元二十年遷州東茜草壩明初復故治拓蒲家庄

犀牛寨而居之州經三遷謂之三瀘○州倚寶山亦名堡子山亦名瀘峯高三十丈下瞰城郭萬瓦鱗集爲一州之勝其麓有木龍巖卽得功山武侯駐節處有馬謖溪出山麓相傳馬謖獻地與屯兵於此又有澄溪亦出山麓俱下流入江

江水又東北沱江自北注之

水經注曰江中有大關小關焉季秋之月則黃鱗死滬也李吉甫曰瀘江水中有大關季春三月黃龍堆沒卽平通紀曰州治東卽爲江潯夏潦水漲兩江環

合瀾漫浩渺如海州人謂之海觀舊有海觀樓亦名
南定樓宋侍郎閻蒼舒詩曰雲南之陰大江東二水
奔騰如海衝誰能具此壯觀眼南定樓中憶卧龍

江水又東北經歸子山

山下撫琴渡是尹伯奇溺處在州東小市之東臺平
如砥方數十丈側有尖峯山有尹夫人馬氏墓卽伯
奇之母也楊雄琴清英曰尹吉甫子伯奇至孝後母
譖之自投江中衣苔帶藻忽夢見水仙賜其美藥思
惟養親揚聲悲歌舡人聞而學之吉甫聞舡人聲疑

似伯奇援琴作子安之操愚謂尹吉甫周人此亦附會馬氏更無可考

長年云石礪關三堆林九節礪火炎礪藍田三壩瓦
窰壩大佛沱堡子山瀘州共三十里小市居士沱歸
子山馬鬃礪小黑灘手扳巖高壩礪得龍溪黃巖驛
共六十里巴巖龍站礪瓦窰灘新礪螞蟥礪天生橋
新路口焦灘臨山驛共六十里按金盤礪極險螞蟥
小黑瓦窰老州四灘次險蓋雲南歲運京銅四百萬
斤自永寧而來至瀘州僱船裝運險灘往往破缸沉

溺故將沿江險灘分別名灘最險極險次險報部以備查核

江水又東南經神臂山

神臂山石壁四周城隍天造俯臨江渚非猿躍鳥騰無能爲攻取計上有平田百頃宋余玠遷州城治之謂之鐵瀘城微徑斜竦不利商人承平之世城非所宜也趙世延先氏書巖記曰合江之北有神臂山呀然虛開清竊竦深袤百十步飛泉簾垂列嶠屏矗嵐光林影映帶左右與崖迴隔山之麓卽先氏書崑通

紀曰鐵瀘城三里讀書崑父老往往過之聞書聲其
後有神童先汪者七歲至其地曰吾讀書故處也遂
寢處其中爲九經注

江水又東南經合江縣城北受赤水赤水源出貴州畢
節縣北蒿芟里楚米坡又東北合孫家河板橋河諸水
又東北合鎮雄州之綿陽河阿朗河又東北經龍場營
西北又東經敘永廳南爲赤虺河又東受猓關水又東
經黎民鎮受清溪又東受沙壩溪又東北受楓香鎮之
鹽井河又西北受齋郎河又西受乘龍山之九溪水又

西經脉困塘受蘭水又西北受水思河又北受儒河又
北受泥溪又西北受盤橋溪又西北受猿猴溪又東北
受金沙溪又東北受葫蘆溪又北受堯溪又北受沙溪
又北受後溪又北經仁懷縣西南境受風溪爲仁懷河
又北受永壽水又北經永寧縣城西爲赤虺河又北經
丁山又北經安樂山下又北經高洞入江

水經曰餽部水從符關東北注酈氏曰安樂水源南
通靈州平夷縣北經漢安縣東又經符縣北入江
其餽部之水所未聞矣或是水之殊目非所究也按

漢書謂南廣縣大涉水北至符入江過郡三行入百四十里汾關山符黑水所出北至樊道入江水經注謂大涉水注符里水竊謂大涉水殆卽此水符黑水則宜賓之南廣江不相通注水經注非也

安樂山亦名少義山俗稱筆架山世傳隋真人劉珍登真之地有天符樹葉如荔枝而長紋如蟲篆是真
人蹟也一夕拔去今無存矣赤水三繞安樂山九繞
文明山曲折如之字故又名之溪寰宇記曰安樂山
在縣東五里八十步羣峯峭拔瀑布千尺唐天寶六

年勅改爲合江山圖經曰安樂山三峯挺秀水遠其
下有石櫃爲昔人藏經之所岐而左有爛柯跡後有
仙影隱隱石壁中岐而右歷木槎臺仙人屋十二盤
至剪刀峽循山有入洞通南巖有石曰許由臺又有
芙蓉城滴水巖白猿洞此三峯之景也黃山谷記曰
安樂山劉真人飛昇之所真人名珍字善慶初卜居
時言焚道平蓋濁而不清江安方山清而不秀山兼
清秀惟安樂山耳遂居之驛城記曰少義山一名裕
山亦如太華之有少華太義之有少義太室之有少室

但彼皆連綴而此去義山千里矣

合江縣故符縣也漢元鼎元年置屬巴郡晉永嘉後
廢齊置安樂縣屬東江陽郡梁廢爲安樂戍周保定
四年置合江縣屬瀘州宋初領遙壇青山安溪小溪
帶頭使君六砦大觀三年分置安溪縣屬純州宣和
四年廢安溪爲砦入合江○常璩曰符縣治安樂水
會東接巴郡樂城南通平夷僇縣

江水又東北受平坦河又東經石貝瀧

江潯一岡嶄然層石累其上宋副使曾震大書石貝

佳景四字於石

江水又北經一尺灘受大鹿溪

一尺灘俗訛爲荔枝灘卽成瑞灘也常璩曰漢永建元年縣長趙祉遣吏先尼和拜檄巴蜀守過成瑞灘死子賢求喪不得女絳年二十五歲乃分金珠作二錦囊繫兒頭下至二年二月十五日女絳乃乘小船至父沒所痛哭自沈見夢告賢曰至二十一日與父屍俱出至日父子浮出縣言郡太守蕭登高上尙書遣戶曹掾爲之立碑人爲語曰符有先絳雙道張帛

求其人天下無有其偶者矣水經注曰絡有二子五
歲以還碑目據後漢書曰永建初健爲孝女叔先雄
以父泥和陸湍水尸喪不歸於溺處自沉後五日與
父尸相持浮江上郡縣表言爲雄立碑愚按此一事
也後漢書謂健爲人華陽記水經注謂在符縣民謠
可據先氏亦符之大姓也碑目獨謂在健爲楊洪山
下孝女渡然碑乃元祐間所立殆健爲別有孝女後
人究其實而不得遂以先女當之華陽記謂成瑞灘
水經注謂成瑞灘或作成濡灘筆畫之訛也白華前

稿曰搜神記犍爲叔先泥和其女名雄華陽國記先
尼和女絡符人又曰淑媛則有元常紀常程玦吳幾
先絡水經江水東南過夔道注引益部耆舊傳符有
光洛夔道有張帛江水又東過符縣北注光尼和女
絡自沉太平御覽引耆舊傳犍爲符泥和氏女名先
雄又溺部引耆舊孝女叔光雄父洵和今范書孝女
叔先雄父泥和蓋與干令升皆謂複姓也困學紀聞
叔先雄水經注作光終何焯曰女而名雄無義理蓋
雜字傳寫之誤以予論之泥者尼之誤說文尼從后

近之也徐鍇曰猶昵也廣韻注和也先尼字和叔而
范氏干氏又丁倒之近世所傳水經注亦未有以絡
爲終者絡帛係古韻絡說洛訛終訛雄訛泥訛灼
不待辨也廣韻注叔先複姓亦沿誤矣常氏以魏趙
先周爲江陽著姓四川誌合江先氏讀書巖唐神童
先汪讀書處宋史忠義傳有先坤朋爲合州張珩內
應豈尼後耶

江水又北經糯米堆

宋權酒監王敦夫記曰江發峨山安行千里至巴渝

上流有大小糯米堆中流巨石實當其衝高下對峙
江之口來浩然奔放直指二灘之上觸爲濤瀨喧阗
振掉險悍可畏舳艫啣尾而來或不戒則與石相遇
雖有智力無可設施

江水又北經黃石龍

舉人夏澤記曰石龍自江中直起長脊高背可數十
丈綿亘逶迤儼若游龍色黃而赤兼之壤土漾沙時
或積之恍如鱗甲然而順流偃卧不以石爲險也夏
秋泛溢水高出其上兩岸皆平蕩然空際波浪不驚

迨水之涸也沙磧在左巖壁處石舟人遠而望之恐
舟之撞巖也急挽舟而北順石龍以下出淺橫流必
出磧上細石成羣亂流衝擊舟橫而側頃之沙石皆
動積與船平舟斯溺矣故冬春之交十沒六七非石
龍爲之也畏巖壁而左行陷磧閣淺之所致也

長年云神背嘴淘竹子甕灘彌陀巖溜光子寡婦漕
牛腦驛共六十里猴子石石鼻子焦石子晒金壩合
江縣共六十里仁懷河明堆鉗口沱連石三灘佛耳
巖石貝瀧史壩驛共六十里門關灘雞婆磧米堆

一尺堆五脉水三渡河黃石龍大東溪石馬口壺瓶
口黃龍礪罐子口鑊鍋礪牛老磧漢水驛共六十里
按石鼻子灘是滇黔銅鉛船報部著名之二十四險
者連石三灘罐子口新定極險淘竹子猴子石折桅子
鉗口石盤磧新定次險

江水又東北經漢東驛

故萬壽縣城也

江水又東北受侯溪侯溪源出永川縣北東經縣城爲
交曲水繞城三面南受松子澗松子澗源出龍洞山東

南入侯溪又南爲洙溶溪入江

龍洞山亦名延陵英山洞中窮絕處有潭泓然或有故蓬敝板自潭深出疑與大江通流九域記曰永川有牛尾永興侯溪龍歸羅市歡樂鐵山咸昌永祥永昌十一鎮而侯溪其一也

永川縣故壁山地也唐大歷十一年分置屬昌州元至元二十二年併入大足明洪武初復置屬重慶府江水又東經滅虎磧

大水險灘也磧上有壩曰晒金土人多淘沙金於此

壩上爲聖鐘山山頂平原廣野田園廬舍竹林陰森
宋蘓東坡之子過居焉過號斜川官中山通判

江水又東而北經金剛碕

亦險灘也楊升菴詩曰金剛灘頭寒雨歇銅鑪驛前
朝望通

江水又北受油溪油溪源出壁山縣西湯峽口南經相
公嶺又南經縣城西又南經馬坊橋爲馬坊溪又南經
關斗石受來鳳溪來鳳溪源出壁山縣東青水關東南
經迎恩橋又東南經縣城東又東南經來鳳橋又南入

油油溪又南經華蓋山下入江

壁山縣故巴縣江津地也唐至德二年分置壁山縣屬渝州元至元十二年省入巴縣明成化十九年復置屬重慶府 國朝康熙初年省入永川雍正六年復置○元和志曰縣本江津萬壽巴三縣地四面高山中央平田周廻約二百里天寶中諸州逃戶多投此營種有孤山西北險峻東南削平土人號爲重壁山宋李潛壁山記曰國朝蜀分爲四而方各有鎮由劍之裏爲七曲劍以東爲白巖劍以西爲玉壘自蜀

而下渝則有壁山是四山者已蜀之鎮一道生靈之司命也

江水又東經龍門灘

卽龍門峽也唐陳子昂詩曰龍門非禹鑿詭怪乃天功西南出巴峽不與衆山同

江水又東北經雙扇門

二石開闔如門水勢洶湧激爲雙漩

江水又東北經五子沱

相傳有弟兄五人巖間各鑿一屋顏曰讀書巖讀書

處讀書所讀書室讀書龕又有公生明思無邪性天
德存天理十二字司馬溫公書

江水又東北經七門灘

七石橫列江中望之如門今名拖木磧亦名黑龍磧
在縣西二里周地圖謂七門郡置在樊人

江水又東北經江津縣城西

繞城北而南屈又轉東行環縣治如几字謂之几水
江津縣故江州地也西魏分置七門郡江陽縣隋開
皇廢郡而縣屬渝州十八年改江津縣唐武德三年

分置萬春縣五年改萬春爲萬壽屬渝城天寶改屬
南平郡乾元初復屬渝州隸建南道宋乾德元年省
萬壽入江津

江水又東受砦溪砦溪源出鼎山穿城北入江

城南有鼎山城北有馬驍山高各刺天邑聚橫前萬
屋鱗列大江從西來委宛曲折濯流杯池激挑蹬石
直注其下鷗鷺往來在烟波杳靄間清絕不可名狀
馬驍山爲北門屏障宋驍騎將軍馬逸葬於此中有
一峯陷於山際獨爲修竦謂之箕星山其右卽石牛

欄相傳石牛爲害鐵柱鎖之今石牛沉於江鐵柱猶存山頂

江水又東北經跳磴磧

磧有石鱗列如磴狀似蓮花名勝記曰蓮花石在江中不恒見見則年豐

江水又東北經梅子口綦江自南來注之

江水又東北經銅鎮驛

有飛龍山卧龍石厥狀惟肖江中有雞心石爲行舟之險山勢巍峩直齒江湍若龍之戲珠羣峯秀聳雙

溪映帶上有天池方廣二十三丈四時不涸古井圍
一丈二尺深不可測爲一域勝地明驛丞楊洪福天
池得雨號爲楊公雨

江水又東北經峯窮峽

石壁刻句曰終古遲新月半邊碍夕陽俗稱落黃鎮
卽古瑤瑛峽口有蜂窩子大水激而爲漩舟輕則
出舟重則沒

江水又東受甘蔗溪

長年云漢東驛羊角灘陽石盤松溉大磯腦羊口磧

草墩山紅花磧鯉魚沱石門驛共六十里澄清巖蓑
衣灘網巾園中白沙母猪磧羊腦巖滅虎磧金剛磧
五臺山石羊驛共六十里油溪老虎沱龍門灘雙漩
五子沱拖木磧江津縣共六十里石牛欄跳磧磧黃
礮灘甕壩磧中山壩蓮花三灘荔枝灘站磧梅子口
虎跳口紅巖磧雞心石荷葉灘銅鑊驛共六十里猫
兒磧觀音碕斑竹沱青石尾珞璜峽老木孔下白沙
陽鱗灘朱亭子雙柏樹甘溪口土腦子魚洞驛共六
十里按觀音碕著名險灘也石牛欄金剛碕雙漩子

羊角灘極險大雞腦峰窩積黃石龍滅虎積次險

江水又東經大茅峽

俗稱貓兒峽亦稱青石尾元有棲真洞相傳茅君棲
隱處此峽石堅稜齒錯礪萬狀噓雲吐月孔竅玲瓏
懸空瀑布雪飛風鳴雷吼四時不輟形既奇特而江
水直搗峽根盤渦旋轉舟最難行驛程記曰過貓兒
峽連峯疊嶂虧蔽雲日一山突起石稜刻露其色青
碧謂之長石尾長年云夏秋水漲石尾沒則舟不敢
行

江水又東北經王坪山

巖高十餘丈壁鏤九龍灘三字灘在江心九石翹首其狀如龍

江水又北經重慶府城南漢水自西北來注之

驛程記曰岷江自敘瀘西南來涪江自綿梓遂諸州西北來嘉陵自閬果諸州巴江自蓬渠諸州東北來至合州同會涪江南下至渝州東北朝天門與岷江會故曰郡承三江之會實四水也三江灌輸四山擁蔽巨峽爲之門戶實巴蜀一大阻

重慶府故巴國也秦置巴郡江州縣晉改巴都郡屬
梁州宋復爲巴郡屬益州齊建武元年分置東陽郡
永泰五年改縣爲墊江移治樊溪尋復故梁泰清末
年武陵王別置楚州新興郡西魏大統十七年改楚
州爲巴州又置漢初縣屬新興周閔帝元年廢東陽
郡改巴州爲楚江墊江爲巴城武成三年改巴城爲
巴縣省枳縣墊江入之隋開皇廢郡爲渝州大業復
巴郡屬梁州唐武德元年復爲渝州分置丹陽縣貞
觀四年分置南平州南平清谷周泉昆川和山白溪

瀛山七縣八年改南平爲霸州十三年霸州七縣俱
廢天寶元年改渝州爲南平郡乾元復故屬劍南東
道宋爲渝州南平郡屬夔州路舊領萬壽縣乾德五
年廢崇寧元年改恭州淳熙十五年以高宗潛藩地
升爲重慶府元至元十二年置重慶路總管府四川
南道宣慰司至正末爲明玉珍所據明洪武四年歸
附仍爲重慶府屬川東道○初太皞生咸鳥咸鳥生
乘釐乘釐生後照是始爲巴人有國名曰流皇辛氏
其城中方三百里其出是塵土五帝以來黃帝高陽

之支庶世爲侯伯及禹治水命州巴蜀以屬梁州周武王伐紂實得巴蜀之師巴師勇銳歌舞以凌殷人倒戈故世稱之曰武王伐紂前歌後舞也武王旣克殷封其宗姬於巴魯之以子其地東至魚復西至焚道北接漢中南極黔涪其屬有濮賓苴共奴穰夷蠻之蠻周之仲世雖奉王職與秦楚鄧爲比春秋魯桓公九年巴子使韓服告楚請與鄧爲好楚子使道朔將巴客聘鄧鄧南郢攻而奪其幣巴子怒伐鄧敗之其後巴師楚師伐申楚子驚巴師魯莊公十八年巴

伐楚克之魯文公十六年巴與秦楚共滅庸哀公十八年巴人伐楚敗於鄢是後楚主夏盟秦擅西土巴國分遠故於盟會希與戰國時常與楚婚及七國稱王巴亦稱王周顯王時楚國衰弱秦惠文王與巴蜀爲好蜀王弟苴私親於巴巴蜀世戰爭周慎王五年蜀王伐苴苴侯奔巴巴爲求救於秦惠文王遣張儀司馬錯救苴巴遂伐蜀滅之儀貪巴苴之富因取巴執王以歸置巴郡江州縣張儀爲築江州城漢末公孫述據蜀遣將從閬中下江州建武十一年岑彭討

述述將田戎敗保江州彭至城下以城固糧多難猝
拔命憑駿守之永興二年三月甲午巴郡太守但望
上疏曰謹按巴郡圖經境界南北四千東西五千周
萬餘里屬縣十四遠縣去郡千二百至千五百里鄉
亭去縣或三四百或及千里太守行桑農不到四縣
刺史行部不到十縣敢欲分爲二郡朝議未許遂不
分郡分郡之議始於是矣獻帝初平元年征東中郎
將安漢趙穎建議分巴爲二郡穎欲得巴舊名故白
益州牧劉璋以墊江以上爲巴郡治安漢以江州至

臨江爲永寧郡胸臆至魚腹爲固陵郡巴遂分矣建
安六年魚腹蹇允白璋爭巴名璋乃改永寧爲巴西
郡以固陵爲巴東郡是爲三巴十六年先主入蜀至
巴郡由江州而北十九年諸葛亮軍至江州破巴郡
建興四年李嚴自永安移屯江州更城大城周圍十
六里欲穿城後山自汶江通水入巴江使城爲洲求
以五都置巴州丞相諸葛亮不許亮將北征召嚴漢
中故穿山不逮

塗山在縣江之南岸山挺而秀壑邃而幽衆峯拱揖

之俗呼真武山有洞俗呼老君洞卽古之塗洞山頂
有鐵柱舟中望之可見明萬歷二十三年立傍有澄
鑑亭華陽國記曰塗山在縣東五千二百步岷江東
圻高七里周圍三十里寰宇記曰塗山在縣東南八
里岷江之南岸高七里周回二十里愚按禹娶塗山
之說一謂在渝州一謂在會稽一謂在富塗一謂在
濠州考後漢書江州注引杜預云巴國也有塗山禹
娶塗山華陽國記曰巴郡塗山有帝禹之廟銘存焉
陶宏景水仙賦注塗山石帳天后翠幙夏禹所以集

羣臣也水經曰江州塗山有夏禹廟塗后祠至今洞
曰塗洞村曰塗村灘曰遮夫石曰啟母賈易巖塗山
碑曰合帝王世紀蜀本紀華陽國記元和記考之禹
乃汶山郡廣柔人生於蜀娶於蜀導江之役往來必
經過門不顧爲可憑信禹曾大父昌意娶蜀山氏女
則女娶於蜀又有自來塗山氏肇自人皇爲蜀君掌
塗山之國亦一徵也據此則江州之塗山爲不可易
矣若當塗之塗山獨應劭漢書注謂九江郡當塗禹
所娶塗山侯國蓋因塗而附會之路史謂當塗本于

湖地晉太康二年成帝徙江北流人僑置當塗縣是
今之當塗併非漢之當塗也若會稽之塗山吳越春
秋日塗山在會稽風俗通曰塗山在永興北今蕭山
縣北然紀年謂禹五年會諸侯於塗山八年會諸侯
於會稽蓋西巡狩至塗山南巡狩至會稽不可合爲
一事左傳專言塗山國語史記專言會稽各指其一
耳且應劭注漢書則曰在九江作風俗通則曰在蕭
山是無確見也若濠州之塗山杜預左傳注曰塗山
在壽春縣東北卽今濠州蘓東坡曰濠州有禹會村

柳子厚塗山銘金仁山前編皆指濠州路史謂以年
計之禹二十事舜三十娶塗山正當治水徐揚之下
故娶在壽春之塗山然濠州壽春不當江河之衝而
治水娶妻益非情事考禹生於堯之五十七載庚子
至七十三載丙辰而舜攝政至七十五載戊午而命
禹平水土時禹年十有八又八年水土平當堯之八
十三載禹年二十有六其子啟生於舜攝位之二十
一載丙子當堯之九十三載則禹年三十有七也禹
八年於外三過其門而不入安得有娶妻生子之舉

書言娶于塗山辛壬癸甲啟呱呱而泣予弗子惟荒
度土功蓋在水土既平之後置井田每夫授田五十
畝盡力乎溝洫濬畝濬距川此則所謂荒度者矣

塗山足之左有黃葛渡上有榕樹俗稱黃葛樹偃仰
渡旁江橫大洲謂之珊瑚琅舟子曲折行乃達彼岸
雨月餘際遙睇江烟蒼茫間舴艋往來輕如一葉來
余玠黃葛晚渡詩曰龍門東去水如天待渡行人暫
息肩自是晚來歸興急江頭爭上夕陽船

塗山足之中有清水溪海棠溪水經注曰縣下有清

水穴巴人以此爲粉則膏暉鮮芳貢粉京師因名粉水故世謂江州墮林粉粉水亦謂之爲粒水矣清水穴之右爲海棠溪溪水出南坪山塢沿壑帶澗曲折入江溪旁舊多海棠當夏漲時挈舟溪入數里而得幽勝焉壁有漢徐庶詩刻沒滅不能讀

塗山足之右有龍門浩巴人謂小港爲浩也積石爲峭壁中斷如門斷處可容艇子出入有二巨石書龍門二字宋紹興石刻有瀑布下垂春遊泛艇必曲折經此渡江而歸門右太嶺曰黃魚嶺江水西南來必

掃磧嶼徐折而下水脉洄湧江心回旋圓轉其形如月

江水又北經石洞峽

卽劉先主置關之所約長二里東北觀音梁綿亘江中右有石巖迤邐江岸夾束江水宛若洞然卽石洞峽也水落石出則石中水聚爲觀音沱賈客艤舟以避風浪夏秋水漲東埽石壁西漫石梁波浪洶湧舟不可行

江水又東北經廣陽沱

益州記曰廣陽洲在縣東七里南有遮要三埕石遮
埕石東二里明月峽壁高四十丈圓孔形如滿月按
遮夫埕相傳塗后故蹟未知何解俗以東潯鸕鵂堆
當之與益州記不合

江水又東北經銅鑼峽

峽在縣東北四十里昔人于此設官榷稅鎖江禦險
江心石上鑄水榷二字峽口石壁間鑿有攔江鐵鎖
舊眼峽長五里許兩巖峭壁摩天乃渝州水路最要
之門戶也巖有圓石如銅鑼明洪武初廖永忠引舟

師出銅鑼峽明昇出降崇禎末張獻忠攻重慶縣令
王錫逆戰銅鑼峽敗之水經注謂江水東逕黃葛峽
山高險全無人居卽此峽也任豫益州記曰黃葛峽
有相思巖芳泉周灌謂之神窟

華陽記曰郡東枳有廣德嶼明月峽故巴亦有三峽
荊州記曰巴陵楚之世有三峽明月峽茲不峽東突
峽太平御覽曰卽今之巫峽秭歸峽歸鄉峽也峽程
記曰三峽謂明月峽巫山峽廣溪峽其瞿塘艷預燕
子屏風不在三峽之數趙子曰三峽以明月峽爲首

巴峽巫峽爲中東突峽爲盡按此通論江峽也宋肇
以西陵巫峽歸峽爲三峽是言夔歸諸大峽寰宇記
以西寧巴峽巫峽爲三峽則當言夔州

江水又東經大臂峽

在縣東一百三十里東岸峭石鱗立巖懸數仞其上
有石長十餘丈直挿峽口若巨靈之伸一臂也西對
金雞碕三灘夏秋水漲最險

長年云魚洞驛釣魚嘴轉盤子石板灘水迎口橫沐
馬尾磧竹節灘老虎口石碑溪落空灘鑽竈子竈門

子青巖河嘯灘柏陽灘九龍灘猪腸子兜子碕三河
壩牛頭溪珊瑚壩洗垢灘黃葛渡巴縣共六十里龍
門浩江北嘴烏龜灘鵠鵠灘觀音梁龍床磧磨船碕
朝陽寺羊背灘寸灘龍灣朝陽洞蜂窩子鉅梁灘猪
腦子長蛇尾蓮花碕銅鑼峽羅溪立石子黃草碕草
捲子臥龍堆猪牙子焦石子野猪巖鬼磧野驢子
長陽溪門堆子魚嘴沱海耙磧麻雀堆雷劈石塞門
灘老蛇堆蔣池沱鮓魚坑斑竹沱明月沱雞公嘴閣
老磧葫蘆灘馬嶺灘斛磧木洞驛共九十里按攢竈

烏龜蜂窩峩鬼馬嶺黑石六灘著名之險也鉅梁門
堆最險龍門雞心極險水迎猪腸青巖牛頭洗垢落
空白鶴雞公野雞鮮魚觀音斷頭梁殷家梁次險

江水又東北受隣水隣水有二源俱出大竹縣西隣山
山左月城山之水西南流爲大隣水山右高梁山之水
西南流爲小隣水二水會於雙河口又南合象溪象溪
源出大竹縣西麓山太極水東經高灘入隣隣水南經
隣水縣合清水爲黃灘河又西南受散水散水源出大
竹縣東北金盤山仙門水南經龍門鎮爲大洪溪南入

隣隣水又西南經大洪岡爲玉溪入江

大隣水爲東溪小隣水爲西溪謂之隣者重山隣比而相次也玉溪亦稱梅溪口

隣水縣故宕渠地也梁大同三年置隣州隣水縣魏改州爲隣山郡隋廢郡以縣屬渠州唐寶歷元年縣廢大中中復置元至元二十年省入大竹明成化二年復置屬順慶府○俗傳郭璞遺碣云日出照華山金銀對馬鞍鴛鴦池裏宿石板響三灘皆縣屬地名也○縣初寄理隣州城隋開皇元年移縣北九里之

岳池溪唐武德二年移今理

江水又東經樂磧鎮

磧深不過丈餘冬水涸時往往膠舟諺云溪不過巴
陽淺不過樂磧華陽國記曰漢置江州郡樂城縣在
州西三百里蜀延熙十七年省名勝記曰今長壽有
樂磧卽樂城縣

江水又東北經長壽縣城南

長壽縣故枳地也唐武德元年分置永安縣二年分
置樂溫縣屬涪州十九年改爲南隣州開元二十二

年省永安入樂溫元至元二十二年省樂溫入涪州
至正中明玉珍改置長壽縣仍屬涪州明洪武六年
改屬重慶府○縣居鳳山之壑以山爲城中脊挺然
在上山頂其形爲鳳凡州縣主山皆以鳳名皆假吉
祥之語絕無形似唯此山爲不愧也縣西北五十里
有樂溫故城東南五十里有永安故城

江水又東北經羊角灘

俗稱不語灘乘舟至此相戒無語聞呼號之聲則水
勢噴涌或高丈餘舊立張桓侯廟以鎮之今乃以爲

桓侯觸怒至有偷張爺鬧巴斗之謔下流有懸巖巖穿鐵索縛夫扳索引舟而上可謂險矣

江水又東北受容水容水源出梁山縣西南五斗山之桂溪南受石龍水又南受沙河水又南受七間水又南受逢溪又南穿壁斗山而出又南受月口水又東南受白龍洞之水又西會白人山之水又西合將軍巖之水三水會合經三河口東南入容容水又南經高灘又南經高洞受大沙河又南受清水清水源出墊江縣西北山谷南經縣北受觀音巖之水又由城北轉而東南受

天馬橋之水又東南經五洞橋入容容水又南爲龍溪
又西經桃花洞爲桃花溪又西受雲臺山之海棠溪又
西南入江

五斗山峯高溪邃林木茂森亭午始見日光兩岸多
桂溪水出焉故爲桂溪下滙爲御史潭流經墊江縣
地墊江之容川桂溪二故縣以此水名也寰宇記曰
桂溪縣有清水有容水在縣南三里猶開州之清濁
二江也又曰樂溫縣有容溪源出縣北南流經縣東
又東南至永安縣東北二里注大江

梁山縣故南浦地也西魏分置萬川郡後周天和二年分置梁山縣屬巴東郡唐改屬萬州宋開寶三年置梁山軍元至元二十年廢軍縣爲州明洪武七年改縣屬夔州府○國朝雍正十二年改屬忠州○縣北二十里有高梁山因以名縣晉張載銘奕奕梁山謂劍閣也寰宇記謂梁山東尾大江西首劍閣凡數千里望之若長雲垂天是欲牽合爲一山而不知漢渠間隔不相連屬也隸梁州之山皆得以梁名獨劍閣乎哉

墊江縣故臨江地也西魏恭帝三年置容山郡容川縣周天和三年改容川爲魏安縣隋開皇廢郡十八年改縣爲墊江屬渠州唐武德元年改屬隣州二年分置清水縣屬忠州九年以墊江屬忠州天寶元年改清水爲桂溪宋熙寧五年省桂溪入墊江元省墊江入鄧都明玉珍復置墊江屬忠州明屬重慶府國朝雍正十一年改屬忠州○孟康漢書註謂墊音重疊之疊然漢之墊江爲今合州

江水又東南受黎鄉溪黎鄉溪源出涪州東南大壩合

三岔河六壬水平灘水龍潭孟溪諸水經兩會口會魚塘之水又北至黎鄉入江

黎鄉溪亦名青羊河水經注曰江水東至黎鄉

長年云木洞灘箭灘豆子石紅沙磧橫梁百丈梁全雞三碛金雞關立石溪大洪溪濠桿口鈴灘石牛欄樂磧鎮羊旺子五雲磧雀石清溪壩石門溪昌谷洞易背沱養蠶堆周家沱石鼓林臺盤林三江灘馬頭磧長壽縣共九十里龍舌灘羊角灘腰汧龍溪磧江流林蓮子磧燒丹碛黃草峽共三十里按王家灘極

險百丈昌谷養蠶龍舌次險

江水又南經黃草峽

杜詩謂黃草峽西船不歸赤甲山下行人稀蓋江本
東北行至此獨西南轉故曰峽西唐大歷四年瀘州
刺史楊子琳叛沿江東下涪州守捉使王守仙伏兵
黃草峽爲子琳所擒卽此益州記謂涪州黃葛峽有
相思巖山草多黃故名黃草峽峽口有山稍低坦可
以屯兵謂之赤甲戍後漢延熙二年馬忠定越嶲置
赤甲軍於此戍尾有溪溪口亂石塞江羈絆馬是謂

之馬絆溪今注杜詩者編黃草入夔州且引峽中記云三峽多黃草虎豹資之又謂黃草峽在涪州赤甲山在夔州皆誤

江水又東南經懷清臺

俗名仙女砦在州西五十里史記曰巴寡婦清得丹穴之利用以自衛始皇以爲貞婦爲築懷清臺括地志曰懷清臺俗名貞女峽在永安縣東北七十里紀勝曰貞女山在涪州沂江四十里江北岸

江水又東經歸龍峽

一名龜龍山一名聚雲山卽水經注雞鳴峽也寰宇記曰四夷縣道記云自涪陵西泝蜀江十五里雞鳴峽上有枳城卽漢枳縣李雄亂後廢桓溫平蜀別立縣於隣溪口

江水又東經荔枝園

紀勝曰城西十五里有妃子園其地多荔枝楊妃多嗜當時以馬遞馳載七日七夜至京人馬多斃於路百姓苦之唐元微之論海味品曰荔子漢和帝取之南海天寶取之涪元和中取之荆南按蔡君謨亦謂

貴妃嗜涪州荔枝東坡亦謂天寶歲貢取之涪則涪
產之供妃嗜也而唐書謂南海歲貢飛馳以進太平
御覽亦謂妃子生於蜀好荔子南海所生勝蜀歲馳
進則又廣東所貢矣又鮑防雜感詩謂五月荔枝初
破顏朝離象郡夕函關是廣西亦貢荔未必天寶時
事也又勝覽曰蜀中荔枝澹敘之品爲上涪州次之
合州又次之

江水又東經涪州城北龍王沱

江水如鑑謂之鑑湖夏月水漲有三漩潰發不可當

也土流有石梁刻雙魚方輿勝覽曰涪陵縣江心有
石刻雙魚魚各三十六鱗一脚芝草一脚蓮花旁有
石秤石斗碑目曰開寶四年石魚見上有廣德元年
二月記云水退魚見豐稔之兆劉君舉詩序曰唐人
所刻見則歲稔

涪州故枳縣也漢置屬巴郡蜀延熙十三年分置涪
陵郡漢平縣宋省漢平入枳省涪陵入巴東齊復置
漢平中興元年故帝寶卷廢爲涪陵王後周省枳入
巴隋開皇廢郡十三年改漢平爲涪陵唐武德元年

置涪州二年置武隆縣溫山縣貞觀十一年分置隆
化縣先天元年改隆化爲寶化天寶改涪州爲涪陵
郡乾元復故屬江南西道宋爲涪州涪陵郡屬夔州
路熙寧三年省溫山入涪陵宣和元年改武龍爲枳
縣紹聖元年復故元至元十二年省涪陵入州二十
一年改屬重慶路明洪武初改武龍爲武隆 國朝
康熙七年省武隆入州○宋紹聖四年程伊川先生
竄涪州居北巖山關堂注周易卽今易傳也尹和靖
燉譙天授定皆來就學別駕黃山谷題之曰鉤溪堂

後人名之曰讀易洞嘉定間州牧范仲武建亭於洞之側曰致遠亭今卽其地爲書院○州東南一百二十里太溪河口有漢平故城東南二百五十里有武隆故城

江水又東受涪陵水

吳舡錄曰大江怒濤水色黃濁黔江乃清冷如玻璃其下悉是石底自成都登舟至此始見清江涪江雖不與蕃部雜居然亦夷俗號爲四種人者謂華人巴人廩君之裔盤瓠之種也一統誌曰入江處有錦繡

州水落則露土人能織錦扇故名夏國孝曰蜀水色
紅如硃黔水色綠如碧雨水滂沛紫廻紅綠相錯如
錦繡江心有洲過當其漚按洲前有灘最險謂之白
鶴灘言白浪飛舞如鶴也范石湖有江險不可泊入
黔江艤舟詩正以此耳俗傳爾朱真人浮江而下漁
人白石網得之擊磬方醒遂於灘前修煉乘白鶴仙
去亦怪說也○水口東吳公山下有石甕磧圖經曰
吳公山本名鐵櫃山俯臨長江屹立如櫃江之北岸
與涪陵縣相望雄壓衆山相傳諸葛武侯屯兵於此

舊城猶存勝覽曰吳太守嘗遊石甕磧見一女郎張
織步磧上曰吾父曾居此也使君異日歷顯任子孫
復守此邦因解玉環相贈遂不見名勝記曰宋吳光
輔爲涪陵守後三十年其孫信仲又守此邦今吳公
溪吳公山所爲得名也溪在州南晏亞夫居之今名
晏溪

江水又東經歇神灘

亦名滑石灘俗傳張桓侯被刺其首漂流至此歇一
宿去至雲陽泊前人收葬之然桓侯被刺於閬安得

漂首至此近舉人何孝先廟牌記曰涪城東北郭桓
侯廟背城面江下臨奔湍爲歇神灘桓侯鎮蜀往來
於此後人追思之立廟以祀此說是也宋大觀中祠
前掘地得三印及佩鈎刁斗上刻侯名仍沉之江以
鎮灘險楊升菴曰刁斗銘文字甚工係八分書

江水又東北經羣猪阡巖二灘

水落見石如羣猪浮游于江面馬提幹詩所謂灘急
羣猪沸巖高落馬懸也夏景宜羣猪灘記曰涪江東
北距城三里許有灘焉怪石林立色黑如豕巨者細

者起者伏者蹶蹄竄者昂首噴者麗然而茁壯者癯瘦欲折如矢養者磊落錯出參差萬狀盛夏水勢洶湧澎湃聲上接城市夜聽益微

江水又東北經大百牽

百丈牽江舟之纜也南史宋武伐超石董舟師入河陽軍緣河南岸牽百丈卽此物也此地岸潤非百丈之纜不可沿泝故名王舟峽船具詩序曰岸石如齒非麻線紉繩之爲前牽取竹之筋者破而用之集爲紉以續之以備其牽者謂之百丈程大昌演繁露曰

蜀水峻岸石又多廉稜若用索牽遇石輒斷故劈竹爲大辦以麻繩聯貫爲牽具是名百丈入蜀記日上峽唯用梢及百丈不復張帆以巨竹四破爲之大如人臂

江水又東受渠溪渠溪源出鐵山之麓西南經北碚鎮入江

北碚有小峽卽水經之東望峽水經注曰江水東逕陽關巴子梁又東右逕黃葛峽又左逕明月峽東至犁鄉歷雞鳴峽江之南岸有枳縣治涪陵水會水乃

延江之支津北注逕涪陵入江其水南導武陵郡江水又東逕涪陵故郡北江水又東逕文陽灘江水又東逕漢平縣二百餘里左自涪陵東出百餘里而屈于黃石東爲銅柱灘又東逕東望峽東歷平都按大江不經涪陵郡又自枳縣至東望峽亦無三百餘里之地蓋錯簡也又東逕涪陵至銅柱灘當在南導武陵郡之下

長年云黃草峽溪沱黃魚嶺馬絆溪橫梁韓公沱瓦窑灘雞冠子寨石青巖紅眼磧仙女砦茶壺磧寧市

驛牛石礪大渠濠火坑沱庶磧灘團堆子李渡歸龍
峽鬼門關荔枝園涪州共九十里滑石灘羣猪灘
巖子三跳石鐵匠石長石尾麻柳沱雞吼子門礪子
大百牽百逐三灘平西壩腰子磧土地灘焦灘焦巖
驛三官灘土腦子南沱北碕共六十里按羣猪灘著
名之險也黃魚嶺最險平峯餓鬼極險馬絆橫梁青
巖麻磧斗巖百逐龍王次險